

**ANG****Bayan**

Pahayagan ng Partido Komunista ng Pilipinas  
Pinapatnubayan ng Marxismo-Leninismo-Maoismo

Edisyong Hiligaynon  
Tuig XXXVIII No. 10  
Mayo 21, 2007  
[www.philippinerevolution.net](http://www.philippinerevolution.net)

Editorial

## Eleksyon 2007: lubos nga garuk

**P**ila ka beses nga ginpalain sang nagaharing barkadahan Arroyo ang garuk nga sistema sang eleksyon sa Pilipinas. Sobra-sobra ang kalakasan, pagdinaya, pagpanuhol, mahigko nga maniobra kag pakusog sa eleksyon sining Mayo. Ginahimo ini paagi sa militar, pulis, mga tinawo sa Comelec kag bukrasya. Labi nga tumingkad ang kawad-on sang unod sang ginasiling nga demokratikong eleksyon sa idalum sang subong nga reaksyunaryong sistema.

Pinakamatingkad ang pagdinaya sang kampo Arroyo sa Maguindanao, Lanao del Norte at Lanao del Sur kon sa diin nagluntad ang halos 12-0 nga resulta sang eleksyon sa pagkasenador pabor administrasyon. Ginsundan pa ini sang pagtuluhaw sang 12-0 pabor sa Team Unity sa pila ka pulo pa nga munisipalidad nga kontrolado sang mga idu-ido ni Arroyo.

Masami ginapabugal sang Team Unity sang Malacañang nga ang boto sa Mindanao kag Visayas ang makapadaug sa ila. Bug-os ang kumpyansa sang mga kahimbon ni Arroyo bangud nakapwesto gihapon ang mga manugdaya nga upisyal sang Comelec sa Mindanao nga imbolbado sa pagdinaya nga "Hello Garci" ni Arroyo sadtong 2004. Sa Mindanao ginhimo ang pinakadaku, pinakalapnagon kag pinakabaraghal nga pagdinaya.

Sa Maguindanao, pareho sa ginbuyagyag sang Moro Islamic Liberation Front, wala sang pagbinotohan nga natabo. Sa baylo, mga *election in-*


*spector* na ang nagpuno sa mga balota nga ginpa-markahan lamang sang mga *thumbmark* sang mga bata. Amo man ang natabo sa Sulu.

Todo-todo man ang pagdinaya sang administrasyon sa Lanao del Norte, Lanao del Sur kag Zamboanga Sibugay. Sa mga lugar nga ini, palareho nga sulat sang kamot sang isa ukon pila ka tawo ang ara sa mga balota kag *canvass* sang mga boto. Paagi sang pagdinaya sa Mindanao, sarang nga butungon paidalum ang tatlo tuhtub apat nga kandidato sang Genuine Opposition agud isal-ot ang mga kandidato sang Team Unity.

Mismo ang Comelec gingamit sa pagdinaya kag manipulasyon sang eleksyon. Sa duso sang Malacañang, ginapauntat sang Comelec ang ginahimo nga pagreport sang

midya sa pag-isip sang boto. Ini bangud sa madamu nga instansiya napaabot gilayon sa publiko ang resulta sang isipay sa mga presinto antes pa man ini maretoke sang mga opereytor ni Arroyo.

Sa Isabela, ginreport sang NDF-Northeastern Luzon nga mismo pinuno sang Comelec nga si Benjamin Abalos ang ginsuhulan sang P200 milyon agud siguruhon nga makapungko si Benjamin Dy bilang gobernador. Ang padihot nga patalsikon si Grace Padaca bilang gobernador naghalin mismo kay



**Mga tampok  
sa isyu nga ini...**

**Sampal kay Arroyo**  
PAHINA 3

**Sunud-sunod  
nga bunal sa AFP**  
PAHINA 5

**Panaysayon sg  
makasiligni nga  
pasismo**  
PAHINA 8

Arroyo. Sa pihak sang abante ni Padaca, ginaatrasar sang Comelec ang iya proklamasyon agud mabag-o pa ang resulta sang eleksyon ditto.

Lapnagon kag hayagan man ang pagdinaya sa mga progresibong *party-list* nga Bayan Muna, Gabriela, Anakpawis, Kabataan kag Suara Bangsamoro. May nadokumento na sila nga 156 kaso sang mga pagdinaya, mahigko nga maniobra kag kalakasan batuk sa ila sa Pampanga, Batangas, Quezon City, Albay, Camarines Sur kag Norte, Maguindanao, Lanao del Sur, Sultan Kudarat, Zamboanga Sibugay kag madamu pang lugar. Lakip sa mga maniobra nga ginhimo sa Mindanao amo ang pagkuha sa *elections returns* (ER) sang pahina para sa *party-list*; di pagbasa ukon paglista sang mga boto para sa mga progresibong partido kag Genuine Opposition; pagpaulihi sa isipay sang boto para sa *party-list* kag mga senador agud lutuon na lamang pagkatapos; bentahan sang mga ER; kag di paghatag sang kopya sang *elections returns* para sa mga progresibong *party-list* kag oposisyon kag sa baylo pagpasa sang mga ini sa mga kadampig sang Malacañang.

Ang mga boto nga sistematiko

ginkaltas sa mga progresibong partido ang igadugang naman sa mga pasista kag mersenaryo nga grupong ginakaptan sang Malacañang kag AFP, pareho sang ANAK, Agap, Aging Pinoy, AKSA, Apoy, ANAD, Bantay, Biyaheng Pinoy, Ahon Pinoy, abono, Kasang-kag Kakusa.

Wala duda may milagro nga ginahimo sa pagpanguna sa listahan sang Comelec sang mga bag-o nga grupong *party-list* pareho sang Abono kg Biyaheng Pinoy. Ang Abono nga nagpakuno-kuno nga organisasyon sang mga mangunguma gintukod ni Speaker Jose de Venecia kag ang Biyaheng Pinoy nga nagapakuno-kuno organisasyon sang mga drayber sang traysikel gintukod sang magulang nga utod ni Comelec Chairman Abalos. Sa listahan sang Namfrel, nagapanguna ang Gabriela Women's Party kag Bayan Muna.

Padayon ang pagtaas sang numero sang mga biktima sang pagpamatay kag iban pang kalakasan angot sa eleksyon. Nadugang sa




157 na nga napatay tubtub Mayo 14 ang pagkuot kag pagpatay sa duha ka *poll watcher* sang Kabataan Party sa Camarines Norte; ang ginluthang nga isa ka katapu sang Bayan Muna kag lider man sang isa ka lokal nga

kandidato sa Iloilo; ang asawa sang isa ka kandidato sa Abra nga ginluthang sang *poll watcher* sang pangontra nga partido; kag isa ka manunudlo kag isa ka *poll watcher* nga napatay sang sunugon sang mga elemento sang Calabarzon Regional Special Action Force sang Philippine National Police ang isa ka eskwelahan sa Batangas.

Sa aktwal nagdaku na sang anum ka beses ang numero sang mga kandidato nga napatay kag nagdaku na sang apat ka beses ang numero sang mga armadong inaway kaangot sang eleksyon halin 1995 tubtub subong. Halin sadtong 2001, ang eleksyon 2007 ang isa sa may pinakadaku nga numero sang mga napatay sa eleksyon kon iupod pa ang mga ginpatay na nga mga lider kag katapu sang mga progresibong grupo nga *party-list* pila ka bulan antes ang eleksyon.

Luwas pa diri ang mabaskog nga militarisasyon, labi na sa mga komunidad sa kaumhan kag kasyudaran kon sa diin mabaskog ang mga progresibong partido kag oposisyon. Ginpaandaman sang militar ang pumuluyo kontra sa pagboto sa mga progresibong partido nga *party-list* kag pilit sila nga ginapaboto sa Bantay, ANAD, Uni-MAD, AKSA kag iba pang partido nga kapot sang Malacañang kag AFP. Sa madamu nga lugar, pareho sang La Union, ginaabangan ang mga *poll watcher* sang mga progresibong partido kag bisan sa sulod na sang mga presinto ginaharas pa sang mga suldado kag pulis. Sa iban nga lugar, hayagan ang pagdeklarar sang *failure or elections* agud makadaya pa.

 <p>Tuig XXXVIII No. 10 Mayo 21, 2007</p> <p>Ang <i>Ang Bayan</i> ginabantala sa lengwahe nga Pilipino, Bisaya, Iloko, Hiligaynon, Waray kag Ingles.</p> <p>Mahimo ini i-download halin sa <i>Philippine Revolution Web Central</i> nga makit-an sa:</p> <p><a href="http://www.philippinerevolution.org">www.philippinerevolution.org</a></p> <p>Nagabaton ang <i>Ang Bayan</i> sang mga kontribusyon sa porma sang mga artikulo kag balita. Ginabuyok man ang mga bumalasa nga magpaabot sang mga saway kag rekomendasyon sa ikauswag sang aton pahayagan.</p> <p>Malab-ot kami paagi sa e-mail sa: <a href="mailto:angbayan@yahoo.com">angbayan@yahoo.com</a></p>	
<b>Kaundan</b>	
<b>Editorial</b>	
Eleksyon 2007: lubos nga garuk	1
Sampal kay Arroyo	3
Saksi sa pagdinaya	4
<b>Madinalag-on nga opensiba sg BHB</b>	
Sunud-sunod nga bunal sa AFP	5
Mga POW, ginhilway sg BHB	7
<b>Pagpanghalit sg estado</b>	
Nagapabungol-bungol si Arroyo	8
Makasiligni nga pasismo	8
Pagkuot kay Burgos, ginkamalaut	9
<b>Balita</b>	9
<p>Ang <i>Ang Bayan</i> ginabantala duha ka beses kada bulan sang Komite Sentral sang Partido Komunista sang Pilipinas</p>	

Pilit nga ginatakan sang PNP kag Comelec ang kamatuoran nga ini. Suno sa ila, "sa kabilugan malinong" kag "wala sang report nga mga insidente sang pagdinaya, maluwas sa magagmay nga kaso." Para tabunan ang ginahimo sang mga militar kag pulis nga naga-pagamit sa mga pulitiko sa pagsabwag kalakasan sa eleksyon, insigida nga ginpasibangud sang hepe sang PNP sa Bag-ong Hangaway sang Banwa ang pagpanunog sa eskwelahan sa Batangas nga ginkamatay sang duha. Sa kaulihanan nabuyagyag nga mga tinawo niya mismo ang ginatudlo sang mga saksi.

WALA'Y TUPONG ang ginbubo nga kwarta, mahigko nga taktika kag pagsabwag sang kalakasan sang Malacañang sining nagligad nga eleksyon. Sa atubang sang mabaskog nga pag-away sang mga demokratikong pwersa, progresibong partido kag oposisyon, gingamit sang barkadang Arroyo ang tanan nga gahum sang estado para balabangan ang mga ini nga makapwesto sa Kongreso kag lokal nga gubyerno.

Pero nagsayup sanday Arroyo kag mga kahimbon niya sa pagsigahum nga wala sang katapusan nga ila makaptan ang poder. Sa ulihi pagasukton sila sang pumuluyo sa tanan nga mabug-at nila nga krimen sa banwa.

Ang sobra nga pagdinaya kag pagpamigos sining nagligad nga eleksyon labi lang nga nagagatang sa nagadabdab nga kaakig sang pumuluyo. Ini tanan nagaduso sa pumuluyo nga pasingkion kag palaparon pa ang ila pagpakigbato—sa parlamento, sa korte, sa karsada kag sa patag sang armadong rebolusyonaryong paghimakas. Indi mag-untat ang pumuluyo tubtub indi mapatalsik ang rehimeng Arroyo kag napabayad sang mahal sa tanan nga krimen sini sa banwa.

## Sampal kay Arroyo

Sa pihak sang todo-todo nga pagdinaya, manipulasyon kag kalakasan sang Malacañang kag mga instrumento sini, wala nahimo nga panason ang boto sang pumuluyo batuk sa rehimeng Arroyo. Nakaangkon sang signipikanteng kadalag-an ang mga progresibong partido kag oposisyon sa eleksyon sa Senado, sa *party-list*, sa pila ka lokal nga pagdumalahan kag distrito kongresyunal.

Daku nga sampal sa rehimeng US-Arroyo ang pagpanguna sang mga oposisyunista kag mga progresibo nga grupong *party-list* sa inisyal nga resulta sang mga isipay. Bisan sa mga baluarte kuno sang mga idu-ido ni Arroyo pareho sang Cebu, Iloilo, Negros Occidental kag Eastern Samar napaslawan sila nga siguruhon ang solidong boto para sa tanan nga kandidato sang Malacañang.

Nagapanguna sa piniliay sa Senado ang madamu nga kandidato sang Genuine Opposition. Lakip sa 12 nga may pinakamataas nga boto amo si Ltsg. Antonio Trillanes IV, isa sa mga lider sang pag-alsa sa Oakwood sadtong 2003 kag isa man sa mga pinakamabaskog nagapakamalaut kay Gloria Arroyo. Sa pihak ini sang iya pagkahunong subong sa Camp Bonifacio, kakulangan sang kwarta kag makinarya pangkampanya.

Tampok man sa eleksyon sa Senado ang gamay nga boto nga nakuha sang mga pangunahong tagpamaba sang rehimeng Arroyo, lakip sanday Mike Defensor kag Prospero Pichay.


Sa piniliay para alkalde sang Makati City, bumuhos ang boto para kay Jejomar Binay, ang oposisyunistang meyor nga makapila ka beses nga gintuyo suspindihon sang Malacañang, amo man sa katiket niya para sa *vice mayor*, konseho kag mga distrito kongresyunal sang Makati. Sa pihak nga bahin, mga 10% lamang sang mga boto ang nakuha ni Lito Lapid, ang suluguon ni Arroyo nga ginpadalagan niya batuk kay Binay.

Nagdaug man sa Pasay City ang napatalsik nga oposisyunistang meyor nga si Wenceslao "Peewee" Trinidad matapos himuon ang tanan sang Malacañang para ihunong siya sadtong 2006 bangud sa himu-himo nga kaso.

Sa Maynila, ginlutos ni Alfredo Lim si Ali Atienza, anak sang subong nga alkalde nga isa sa mga pinakamasupog nga alyado ni Arroyo kag manugtapna sang mga rali sa Maynila. Nangako si Lim nga igabatura na niya ang polisiya nga nagabawal sang rali sa Mendiola.

Sa una nga distrito sang South Cotabato, wala padaug ang kasikatan sang boksingero kag tuta sang Malacañang nga si Manny Pacquiao kay Darlene Antonino-Custodio, isa sa mga oposisyunista nga kongresista nga nanguna sa pagsulong sang kasong *impeachment*.

Sa unang distrito sang Bukidnon, ginlutos ni Malou Acosta, isa ka





oposisyunista, si Virgilio Garcillano, ang opereytor nga nakilala sang bilog nga pumuluyo bilang “Garci” sang mabuyagyag ang paghimbunanay nila ni Gloria Arroyo sa pagdinaya sa eleksyon.

Sa Naga City, nalutos sang oposiyunista nga si Jessie Robredo ang kandidato sang administrasyon sa pagkaalkalde nga si Jojo Villafuerte, hinablos ni Luis Villafuerte nga presidente sang partido pulitikal ni Arroyo. Sa pihak ini sang pagtinguha sang Malacañang kag mga Villafuerte nga madiskwalipika si Robredo. Ginaakusahan siya nga indi Pilipino bangud ang lo-lo niya sa tuhod naghaling sa China.

Sa Pampanga, ang prubinsya ni Gloria Arroyo, isa sa pinakamatunog nga sampal sa guya sang peke nga presidente amo ang pagdaug sang bag-uhan nga si Fr. Ed Panlilio sa pareho nga maki-Arroyo nga mga kandidato nga sanday Lilia Pineda kag Mark Lapid. Si Lilia amo ang asawa ni Bong Pineda, isa ka daku nga *jueteng lord*, kasimanwa kag suod nga alyado ni Arroyo. Si Lapid, nga malapit man kay Arroyo, ginaakusahan nga nangupit sang tubtub bilyon ka pisos nga bayad sa gubyerno sang mga nagahakot sang grabas halin sa mga suba sang Pampanga.

Sa Iloilo, temprano nga nagbaton sang kalutusan sa eleksyon pagkagubernador si Roberto Armado, kandidato ni Arroyo batuk sa subong nga gubernador nga si Niel Tupas Sr. Si Tupas isa ka kilala nga oposisyunista nga gintuyo patalsikon sang rehimeng Arroyo sa kapitolyo sadtong nagligad nga Enero.

Sa Isabela, ginlutos liwat sang nagapungko nga gubernador nga si Grace Padaca ang *warlord* kag maki-Arroyo nga si Benjamin Dy.

Sa pihak man sang padayon nga kampanya sang pagpamatay, pagpamigos kag pagpamahug batuk sa mga progresibong partido, nagapanguna ang Bayan Muna (BM) kag Gabriela Women’s Party (GWP) sa eleksyon para sa *party-list*. Sa listahan sang Namfrel, ara sa una nga duha ka pwesto ang Bayan Muna kag Gabriela Women’s Party. Ginalauman man nga makakuha sang nagakaigo nga boto ang partido nga Anakpawis para makapungko ang minimum nga isa ka tiglawas sa Kongreso.

AB

## Saksi sa pagdinaya


Kakoros ni Gloria Arroyo ang iya mga hepe sa AFP kag PNP sa pagpahambog sa bilog nga kalibutan nga ang eleksyon sadtong Mayo 14 nangin hilway, areglado kag demokratiko.

Napamatud-an nga wala’y unod ang pagpadayaw nga ini sa konsolidadong report sang People’s International Observers’ Mission (IOM) nga ginsaysay sa midya sadtong Mayo 18. Ang IOM ginatapan sang 27 unyonista, estudyante, aktibista, tawong-simbahan, akademiko, artista kag abugado halin sa Australia, Belgium, Canada, Germany, South Korea, Japan, Myanmar, Norway, Scotland, The Netherlands, Switzerland kag US nga nagpanilag, naglista kag nagreport bahin sa mga nasaksihan nila sa dalagan sang eleksyon sa nagkalain-lain nga lugar sa Pilipinas. Halin Mayo 14 tubtub 16 ginkadtuan sang IOM ang pito ka yabing rehiyon sang Pilipinas. Malaparan nila nga nahinun-anon ang apektadong botante, nga nakuhaan sang nakabidyo nga mga testimonya. Nakakuha sila sang pila ka gatos nga retrato halin sa 10 erya pareho sang Tondo, Maynila; Makati City; Quezon sa Southern Tagalog; Sorsogon kag Masbate sa Bicol; Nueva Ecija kag Pampanga sa Central Luzon; Cebu sa Central Visayas; Marawi City sa Lanao del Sur; kag Compostela Valley sa Southern Mindanao.

Suno sa IOM, indi na lang sa sakup sang Pilipinas talalupangdon ang lebel sang kagarukan sang eleksyon sang 2007. Nalakip na ini sa listahan sang pinakamahigko kag pinakamaduguon nga eleksyon sa bilog nga kalibutan. Sa kakibot kag pagkadismaya sa kahigkuon sang eleksyon kag kasingkion sang kalakasan nga ila nasaksihan, ginsiling sang isa ka dumuluong nga taga-obserbar nga mas malala pa ang eleksyon sa Pilipinas sangsa naagyan niya sa Afghanistan kon sa diin nangin pinakamasingki ang kalakasan sa eleksyon.

Bisan sa atubangan sang mga dumuluong nga taga-obserbar, wala lipud-lipod nga ginahimo sang mga idu-ido ni Gloria Arroyo ang pagbakal sang boto, pagmanipular sa resulta sang eleksyon, pagpamahug, pagpamomba kag iban pang maniobra kag kalakasan paagi sa mga pwersang militar kag pulisya, mga *private army* sang mga pulitiko kag pati sang mga upisyal sang Comelec. Bisan mga dumuluong nga taga-obserbar wala makalibre sa pagpamahug sang mga militar sang ginharas sila sa Cebu kag Nueva Ecija.

Suno sa OIM, “hungod kag planado ang kinagamo” sa eleksyon agud balabagan ang pagboto sang mga botante nga indi kontrolado sang mga maki-Arroyo nga kandidato. Lapnagon man ang pagpamahug, baliskad sa mga ginapabugal sang Malacañang nga ang mga botante nga Pilipino “nagsumiter sang ila mga balota nga wala sang pinilitay kag



Sundan sa “Saksi,” sa pahina 5



38 armas ang naagaw, 31 ang napatay, 37 napilasan kag 6 ang nabihag

## Sunud-sunod nga bunal sa AFP

**N**akabaton sang sunud-sunod nga mga bunal ang mga bayarang tropa sang rehimeng US-Arroyo sa Abra kag sa iban pang lugar sa Pilipinas halin Mayo 3 tubtub Mayo 16. Sa kabilugan, 31 reaksyunaryong tropa ang napatay, 37 ang napilasan kag anum ang nabihag, lakip ang isa ka tinyente kag mga *non-commissioned officer*. Nadugangan man ang arsenal sang hangaway sang banwa sang 38 armas nga may nagkalain-lain nga kalibre, lakip ang isa ka M60 *light machine gun*.

**Sa Abra.** Napapas sang mga Pu-lang hangaway sa idalum sang Agustin Begnalín Command (ABC-BHB)-Abra ang walo nga suldado nga kabahin sang 3rd Platoon, "A" Coy sang 41st IB sa Barangay Amtuagan, Boliney sadtong Mayo 16. Nagsugod ang ambus alas-5:45 sang aga kag naglawig ini sang 45 minutos.

Pito ka suldado kag isa ka elemento sang CAGFU ang napatay kag pito nga iban pa ang napilasan. Lakip sa napatay amo si 2Lt. Mark Evan Onrubia, kumander sang 3rd

Platoon nga kabahin sang 50-kataong yunit nga nagapatrulya sadto sa sentral nga bahin sang prubinsya.

Liwat nga nag-igrab ang inaway makalipas ang halos duha ka oras mga duha ka kilometros na ang kalayuon halin sa una nga lugar sang gin-awayan. Diri nag-angkon sang dugang nga duha ka patay ang Philippine Army kag indi pa mahibal-an nga isip sang mga pila-

son.

Sa una nga ambus nakakuha ang mga Pulang hangaway sang lima ka M16, duha ka M14, isa ka M203 *grenade launcher*, 1,600 bala kag walo nga *bandolier*. Nakakumpiska man sila sang lima ka bakpak halin sa mga pasistang tropa.

Pagkahapon sang adlaw nga ina ginhilway sang ABC-BHB ang apat nga POW nga ginpangunahan ni 2Lt. Jeron Labrador Etrone, kumander sang "C" Coy sang 77th IB. Nadakup sila sa isa ka tsekpoynt sadtong Mayo 15 sang aga. Nakumpiska sa ila ang duha ka .45 kal. pistola kag iban pang kagamitan militar. (*Para sa dugang nga detalye, basahon ang kaangot nga artikulo.*)

Antes ang ambus sa Barangay Amtuagan, naglunsar sang operasyong isnayping sadtong hapon sang Mayo 14 ang isa pang yunit sang ABC batuk sa *patrol base* sang 41st IB sa Barangay Kilongolao sa banwa gihapon sang Boliney. Isa ka elemento sang CAGFU ang napatay sa operasyon nga ini.

**Sa Northern Samar.** Nagapauli na sa ila kwartel ang mga nagapatrulya nga suldado sang 20th IB sang lambatan sila sang BHB sa Barangay Magsaysay, Lope de Vega sadtong Mayo 13 alas-5:45 sang

*Sundan sa "Bunal," sa pahina 6*

*"Saksi," halin sa pahina 4*

nagaayon sa kaugalingon nga pagdesisyon."

Sistematiko nga nagpasilabot ang militar sa prosesong elektoral, siling sang IOM, gani nauk-ok ang demokrasya kag nakulbaan ang pumuluyo nga gamiton ang ila kina-

matarung nga magboto. Lapnagon ang presensya sang mga batalyon sang AFP, kag nagapadayon ang mga kampanyang saywar kag mga kaso sang harasment tubtub sa mahiwat ang eleksyon. Ginamanduan ang mga botante nga indi pagiboto ang pila ka grupo sang *party-*

*list* nga ginbansagan mga prente sang Bag-ong Hangaway sang Banwa, siling sang IOM. "Bangud sa lapnagon nga pagdinaya, pagpanginto kag manipulasyon, imposible nga magluntad ang patas kag malimpyo nga eleksyon," siling sini.

AB



aga. Isa ang napatay kag duha pa ang napilasan. Nagkuyab sang dala-gan ang iban pang militar. Nakaa-gaw ang mga Pulang hangaway sang isa ka M60 *light machine gun*, isa ka M14 kag mga bala.

**Sa Mountain Province.** Gin-ambus sang isa ka yunit sang Leonardo Pacci Command sang BHB-Mountain Province ang apat-nga-salakyang komboy sang masupog nga 54th IB sadtong Mayo 12 sa Barangay Sukit, Bontoc. Tatlo ang napatay kag 17 ang napilasan, lakip ang berdugo nga kumander mismosang "C" Coy sang 54th IB nga si 2Lt. edward Siaed.

Ginhimo ang paglambat sa Bontoc-Paracelis Road bandang alas-11 sang aga kag walay sablag nga nakaatras ang mga Pulang hangaway bandang alas-12:20 sang hapon nga wala sang kaswalti. Ang 50-katawo nga yunit nakahalin lang sa lima ka adlaw nga pag-operasyon sa sidlangan nga bahin sang Mountain Province.

Ang ambus isa ka aksyong pangsilot batuk sa 54th IB, suno kay Ka Magno Ugyaw, tagapamaba sang Leonardo Pacci Command. Pila sa mga matingkad nga krimen sang berdugong yunit sang militar:

- ilegal nga paghalughog sa mga payag kag pagpangawat sa mga taguan sang humay sang mga mangunguma sa Saclit, Padanga kag sa Patang, Tonglayan, Natonin sadtong Nobyembre 18-20, 2006.
- pagpatay sa estudyante nga si Michael Uydang sang Gueday, Besao sadtong Hulyo 2006;
- pagsunog sa tatlo ka balay sang magamay nga minero sa Chapek Creek, Mainit sadtong Marso 20-23, 2006; kag
- pagpatay sa mangunguma nga si Etfew Chadyaas sadtong Agosto 5, 2003 nga ginpasibangdan

sang militar nga isa ka kumander sang BHB.

**Sa Quezon.** Ginlambatan sang BHB ang nagap-atrulya nga platoon sang 76th IB sa Barangay Bantad, Gumaca sadtong aga sang Mayo 11. Isa ka soldado ang napatay sa inaway nga ini.

**Sa Mindoro.** Lima ka katapu sang 407th Provincial Mobile Group sang Philippine National Police (PMG-PNP) ang napatay kag anuman pa ang napilasan sa ambus nga ginlunsar sang mga Pulang hangaway sang Lucio de Guzman Command sadtong Mayo 10, alas-7 sang aga sa Sityo Tugtugin, Barangay Batasan, San Jose, Occidental Mindoro.

Lulan sang isa ka dyip nga back-to-back ang mga tropa sang PMG sang malukpan sila sang *command-detonated land mine*. Kasunod sang paglupok ginpaulangan sang bala ang mga kaaway, pati ang mga tropa nga una nga nagpanaug kag naglakat. Pila ka minutos ang nakaligad nakaatras na ang mga Pulang gerilya halin sa lugar nga gintabuan bangud wala na nakabato ang mga pulis.

Nakaagaw ang BHB sang apat nga M16, duha M14, isa ka M203 *grenade launcher* kag madamu nga bala.

Sa ila pahayag sa midya sadtong Mayo 11, gin-athag sang Lucio de Guzman (LDG) nga ang ginhimo nga ambus isa ka lehitimo nga operasyong militar. Lehitimo nga mga target ang mga tropa sang PMG nga nagahimo sadto sang "*clearing operations*" para sa miting de abanse ni Gov. Josephine Ramirez-Sato.

Ginhimutig sang LDG ang gusto paluntaron ni Sato kag kahimbon

niya nga mga upisyal sang militar kag pulisya nga ang pagpanglambat tulod sang indi pagbayad sang gobernador sang "*permit to campaign*" sa BHB.

Antes ini, ginlambatan sang BHB ang mga armadong badigard ni

Mayor Alex Aranas sang Pola, sadtong hapon sang Mayo 4 sa Sityo Proper, Barangay Matula-tula, Pola. Ginreport ni Higom Maragang, tagapamaba sang LDG, nga napatay sa inaway nga ini sadtong Lt. Policarpio Malvar Dimaano sang 68th IB kag isa ka pulis. Naagaw sang mga gerilya sang pumuluyo sa mga pwersa pangseguridad sang alkalde amo ang duha ka M16, isa ka karbin, anum nga .45 kal. pistola kag isa ka .38 kal. revolver.

Nakigluthanganay ang mga badigard ni Aranas pero napilitan sila nga magsurender sang masulod sang BHB ang balay nga ila ginpanaguan. Nabihag si Aranas kag duha niya ka pulis pero ginhilway man sila pagkatapos sang pila ka oras. Ginsugilanon sang mga responsableng kadre ang alkalde kag ginhatagn siya sang mabaskog nga paandam angot sa mga kasal-anan niya batuk sa pumuluyo kag rebolusyonaryong hublag.

Lakip sa mga kasal-an amo ang pagpatay sa mag-amay nga Perlas nga taga-Campaminto; pagbakol sa duha ka mangunguma nga taga-Calimo; kag paggamit sang mga armadong badigard nga militar akog pulis sa pagpangampanya ng mabaskog nga ginadumili sang BHB. Antes ginhilway si Aranas ginpanugyan siya nga halinan ang banwa sang Pola kag untaton na niya ang



pagkighimbon kay Col. Mario Chan sang 204th Infantry Brigade.

**Sa Negros Occidental.** Ginlambatan sang mga Pulang hangaway sang Jean Pelle Command sadtong Mayo 10 sang aga ang mga tropa sang 33rd Recon Coy sa Sityo Malasaging, Barangay Pinapugasan, Escalante City. Nagabot ang panabang nga pwersa pero ang mga ini gin-ambus man. Nakaagaw ang BHB sang isa ka M16, isa ka M14 kag madamu nga bala.

Sadtong Mayo 5 naman, pila ka kolum sang 303rd Bde nga nagasuyod sa kaumhan sang Moises Padilla ang gin-ambus sang mga gerilya sang Leonardo Panaligan Command. Ginpili nila ang pinakamahina nga kolum sang kaaway. Apat na suldado ang napatay kag duha pa ang napilasan samtang wala sang kahalitan nga naagum ang BHB.

Bunga sang madinalag-on nga ambus, nabulabog ang iban pa nga kolum sang Philippine Army kag nagdinalagan ang mga ini. Nakaagaw naman ang mga Pulang hangaway sang apat ka M16 kag isa ka .45 kal. pistola.

Antes ini, gin-ambus sang isa ka yunit sang Roger Mahinay Command ang mga bandido nga Revolutionary Proletarian Army-Alex Bongcayao Brigad (RPA-ABB) sa Barangay Pinggot, Ilog sadtong Mayo 3. Nakaagaw ang BHB sang duha ka M16 halin sa mga nagdinalagan nga bandido nga duha sa ila ang napilasan. Ang RPA-ABB aktibo nga katuwang sang 61st IB sa pagsabwag sang terorismo sa kaumhan.

AB

## Mga POW, ginhilway sang BHB

**G**inhilway subong nga Mayo sang Bag-ong Hangaway sang Banwa (BHB) sa mga rehiyon sang Ilocos-Cordillera (ICR) kag Southern Mindanao (SMR) ang ila mga nabihag nga suldado.

Sa ICR, ginhilway sining Mayo 16 sa Baoyan, Boliney, Abra sanday 2Lt. Jero Labrador Etrone, kumander sang "C" Coy sang 77th IB sang Philippine Army, Sgt. Restino Angoluan Alabon, Sgt. Alexander Salvador Paulo kag Cpl. Eugenio Soriano, Jr. Nabihag sila sadtong Mayo 15 sang aga sang mag-agi sila sa isa ka tsekpoynt nga gintukod sang BHB sa katung-anan sang Barangay San Ramon, Manabo kag Barangay Baoyan, Boliney.

Sa isa ka pahayag, ginsiling sang Agustin Begnalen Command sang BHB-Abra nga ginhatagan ang mga bihag sang mga kinamatarung kag mga pribilehiyo nga santo sa ila kahimtangan bilang mga *prisoner of war* ukon POW. Gin-uli sang BHB ang tanan nila nga mga personal nga kagamitan, pati ang duha ka motorsiklo nga ila ginsakyan sadto. Ginbuhian sila sang mapamatud-an nga wala sila sang mga utang nga dugo sa pumuluyo kag mga paglabag sa tawhanong-kinamatarung. Pero kinumpiska sang BHB ang duha nga .45 kal. pistola sang mga suldado bangud ini mga gamit panggera.

Saksi ang mga upisyal sang Barangay Council sang Baoyan, mga tumanduk nga lider kag tagabaryo sang pirmahan nanday Etrone kag mga kasubong niya nga suldado ang isa ka kasulatan nga nagasaad nga maayo sila nga gintrato bilang mga POW. Ginbuyok man sila sang mga katapu sang hangaway sang banwa nga bayaan na lang ang reaksyunaryong AFP ukon indi gani respetuhon ang mga probisyon sang Comprehensive Agreement on Respect for Human Rights and Interna-

tional Humanitarian Law (CARHRIHL).

Sa SMR, ginhilway man sang Merardo Arce Command (MAC) sadtong Mayo 8 sa Trento, Agusan del Sur si S/Sgt. Alberto A. Baludoya. Si Baludoya nabihag sang BHB sa isa ka tsekpoynt nga gintukod sa Barangay Aragon Road, Cateel, Davao Oriental sadtong Abril 13.

Napamatud-an nga may sala si Baludoya nga mga kontra-rebolusyonaryong buhat. Sa sulod sang 17

tuig niya nga pagserbisyo sa AFP, aktibo siya nga nagpartisipar sa mga operasyong kombatan kag paniktik kag iban pang hilikuton nga mapanghalit sa masa sa mga banwa sang Asuncion kag Talaingod sa Davao del

Norte, sa Loreto, Agusan del Sur kag sa nagkalain-lain nga banwa sang Davao Oriental. Bilang kumander sang detatsment sang 72nd IB sa Barangay Aliwagwag, Cateel, ginpamunuan niya ang pagrekrut sang CAFGU, paglunsar sang mga operasyong SOT kag pagtukod sang mga detatsment sa mga sibilyan nga komunidad, nga lunsay lapas sa internasyunal nga tawhanong-kinamatarung.

Ginhilway siya bangud sa mga basehang makatawo sang magapelar ang iya mga ginikanan. Ginatras ang mga akusasyon batuk sa iya, pero pagabuhion ini kon padayon niya nga kontrahon ang rebolusyonaryong hublag kag pumuluyong Pilipino, suno kay Kasamang Rigo-berto Sanchez, tagapamaba sang MAC.

AB





# Mga krimen ni Arroyo, labi nga nagadamu

**P**adayon ang pagpanghalit sang mga uhaw-sa-dugo nga berdugo ni Arroyo sa pihak sang nagalapad nga internasyunal nga kundemnasyon.

Base sa pinakaulihi nga report nga nakalap sang *AB*, tatlong myembro sang mga progresibong partido ang ginpatay kaangot sa eleksyon sa Camarines Norte kag Iloilo. Apat naman ka myembro sang militanteng grupo sang mangunguma ang ginpatay sa Agusan del Sur kag Negros Occidental. Ginpatay man sang mga suldado kag ginsunog ang mga bangkay sang isa ka iloy sa Surigao del Sur.

**Mayo 16.** Nakit-an nga patay sanday Jun Bagasbas, 20, kag Ronilo Vallevare, 16, sa katung-anan sang Barangay Matague kag Cabataguangan sa Capalonga, Camarines Norte. Sanday Bagasbas kag Vallevare, mga organisador kag *poll watcher* sang Kabataan Party, ginkuot sang mga ginasuspet-sahan nga suldado sadtong gab-i sang Mayo 15.

**Mayo 14.** Ginluthang sang mga elemento sang *death squad* si Melbert Camariosa, 32, samtang nagapauli siya halin sa natapos gid lang nga *canvassing* sang mga boto sang mga kandidato sa Igdampog Sur Primary School, Igdampog Sur, Tubungan, Iloilo. Naigo si Camariosa sa dughan kag wala na makalab-ot nga buhi sa ospital. Maluwas sa pagka-katapu sang konseho sang barangay, siya aktibong katapu man sang Bayan Muna (BM) kag tagakampanya sang isa ka kandidato sa pagka-alkalde sa Tubungan.

**Mayo 5.** Ginpatay sang mga berdugo ni Arroyo si Jorge Dinolan, 40, myembro sang Nagkahiusang Mag-uuma sa Agusan del Sur. Naghalin si Dinolan sa ila balay sadtong Mayo 4 kag wala na makauli. Masunod nga adlaw, nakita na lamang ang iya bangkay malapit sa suba sang Umayam. Luwas sa igo sa ulo, nag-angkon man ang biktima sang madamu nga pasa sa lawas.

**Mayo 5 tubtub subong.** Tatlo ka mangunguma ang wala'y kaluoy nga minasaker sang nagaoperasyon nga mga elemento sang 11th IB sa Sityo Malipayon, Barangay Sibucauan, Isabela,



Negros Occidental. Ang mga biktima amo sanday Benjamin Gellonga, 72; Richard Sarillo, 28; kag Bobby Quilo, 20. Tanan sila mga sibilyan nga taga-Upper Coyaoyao, Barangay Inulingan sa katambi nga banwa sang Moises Padilla kag lunsay mga myembro sang Barangay Inulingan Farmers Association (BIFAD), isa sa mga alyadong organi sasyon sang Kilusang Magbubukid ng Pilipinas (KMP). Pero ginprisintar sila sa midya ni Lt. Col. Jess Mananquil, kumander sang 11th IB, bilang mga katapu sang BHB.

Bunga sang makasiligni nga krimen, halos 1,000 katawo ang nagbakwit sa ila mga puluy-an kag temporaryo nga nagaistar sa mga eskwelahan kag kapilya sang mga banwa sang Moises Padilla kag Isabela. Bangud sa kabudlayan sang kahimtangan sa mga sentro sang ebakwesyon namatay ang 84 anyos nga si Sotero Aborado. **AB**

## Panaysayon sang makasiligni nga pasismo

SADTONG hapon sang Abril 2 nagapahuway sa isa ka payag sa Barangay Caromata, San Miguel, Surigao del Sur sanday Betty Quillano, 37, kag walo pa ka babaye kag tatlo ka bata upod ang anak niya nga si Dan-Dan, 11. Gulpe na lamang sila nga ginpaulanan sang bala sang mga suldado sang 58th IB, Special Civilian Armed Auxillary (SCAA) kag Civilian Armed Auxillary (CAA). Naigo sa tiyan si Dan-Dan, nga gilayon niya nga ginkamatay.

Nakadalagan si Betty pero nadakup siya sang mga suldado. Gindala siya sa higad sang bangkay sang iya anak, ginbakol kag ginlampos ang ulo tubtub nga mapatay. Pagkatapos sini ginpang-utod-utod ang lawas sang mag-iloy kag ginluthang liwat. Gin-upod ang ila mga bangkay sa ginpatay nga baboy kag dungan sila nga ginsunog. Pila ka oras pagkatapos sini naghulog sang bomba ang isa ka Huey helikopter sa lugar nga gintabuan. Gilayon nga ginbalita sang 402nd Bde nga nasulod sang 48th IB ang isa ka kampo sang Bag-ong Hanga way sang Banwa sa Barangay Caromata.

Bangud sa sunud-sunod nga paglagas nga operasyon, sadtong Abril 11 na lamang nakita sang mga himata ang isa ka sunog nga til sang bata kag isa ka bungo sang may edad nga posible iya sang mag-iloy nga Betty kag Dan-Dan. Indi nila mahatagan sang disente nga lubong ang mag-iloy bangud padayon gihapon nga ginabantayan ang lugar sang mga pwersang paramilitar. **AB**





## Pagkuot kay Burgos, padayon nga ginakundenar

**G**inahingyo ni Ambassador Alistair MacDonald, pinuno sang delegasyon sang European Commission, nga lubaron na sa labing madali nga panahon ang ka-so sang pagkuot kay Jonas Joseph “Jayjay” Burgos nga tubtub subong wala pa ginapakita. Nagpahayag sang labi nga pagkabalaka si MacDonald sa padayon nga pagkadula ni Burgos nga kumpirmado nga ginkuot sa isa ka restawran sda Quezon City sadtong Abril 28.

Gin-anunsyo man ni MacDonald ang pagbisita sang isa ka tim sang mga eksperto halin sa mga myembro nga pungsod sang EU subong nga Hunyo 4 agud tasaron ang mga kinahanglanon sang gubyerno sang Pilipinas para mauntat na ang nagkalain-lain nga mga paglabag sa tawhanong-kinamatarung.

Samtang, sa isa ka manipesto sadtong Mayo 11, nagpetisyon ang Concerned Citizens of the Philippines sa European Union kag sa United Nations nga tukuron ang UN International Criminal Tribunal nga magasukot sa gubyernong Arroyo sa salabton sini sa mga ekstrahudisyal nga pagpamatay sa mga myembro sang mga militanteng grupo sa Pilipinas kag ginpamilit nga untaton na sini ang nasambit nga mga pagpamatay. Ang manipesto ginbaton ni Gabriel Munuera Vinals, pinuno sang Political, Economic and Trade and Public Affairs Section sang delegasyon sang European Union.

Sadtong Mayo 16 mabaskog nga ginhingyo sang Asian Legal Resource Center (ALRC), Asian Human Rights Commission (AHRC) kag Karapatan sa United Nations Human Rights Council (UNHRC) kag iban pang grupo nga pungan ang pagpungko liwat sang gubyerno sang Pilipinas sa nasambit nga konseho.

Suno sa ALRC, AHRC kag Karapatan, wala sang anuman nga pagbag-o sa kahimtangan sang tawhanong-kinamatarung sa Pilipinas sa pihak sang panug-an sang gubyernong Arroyo sadtong Mayo 6, 2006 sang mabutang ini bilang katapu sang UNHRC. Sa kamatuoran, siling sang ALRC, labi pa gani nga naglala ang kahimtangan sang tawhanong-kinamatarung sa Pilipinas bangud nagaabot na subong sa halos 900 ang mga biktima sang asasinasyon pulitikal kag 198 na ang pilit nga nagakaladula halin 2001.

Pero bunga sang mabaskog nga pangampanya sang rehimeng Arroyo, ginhatag gihapon sa Pilipinas ang pwesto bilang membro sang UNHRC sa masunod nga tatlo ka tuig.

AB

## Pagpanunog sa Batangas, mabaskog nga ginkundenar ni Ka Roger

PAAGI sa mensahe nga *audio*, mabaskog nga ginpakamalaut ni Gregorio “Ka Roger” Rosal, tagapamaba sang Partido Komunista sang Pilipinas, ang pagsunog sang mga pulis sa isa ka eskwelahan sa Taysan, Batangas sadtong Mayo 15 sang kaaganhon. Namatay sa sunog si Nellie Banaag, isa ka manunudlo sang Pinagbayanan Elementary School sa Taysan kag si Leticia Ramos, isa ka *poll watcher*.

Ginainsister ni Rosal nga bawion gilayon sang PNP Dir. Gen. Oscar Calderon ang nauna niya nga akusasyon nga mga katapu sang Bag-ong Hangaway sang Banwa ang naghimo sang nasambit nga krimen. Dapat siling niya nga mangayo sang pasaylo ang pulisya sa mga paryente sang mga biktima kag sa pumuluyo sang Taysan.

Suno pa kay Rosal, indi mahimo sang BHB ang nasambit nga pagpanunog kag ang anuman nga pagpanakit sa pumuluyo.

Napamatud-an sa mga imbestigasyon nga ang pagpanunog kahimuan sang lima ka elemento sang PNP Regional Special Operations Group (RSOG) kag Special Action Force (SAF) sang Batangas, lakip si Chief Insp. Roberto Marinda. Suno sa mga saksi, tatlo ka adlaw antes matabo ang pagpanunog nakita nila ang mga nasambit nga pulis sa *campaign headquarters* ni Mayor Hernando Villena nga nagapadala-gan liwat sa pagkaalkalde.

## Arroyo, ginpakamalaut sang mga partido kag organisasyon nga komunista

GINAPASALAMATAN sang Partido Komunista sang Pilipinas (PKP), Bag-ong Hangaway sang Banwa (BHB) kag sang bilog nga rebolusyonaryong hublag kag pumuluyo ang mga partido komunista kag rebolusyonaryong organisasyon nga nagakundenar sa lapnagon nga paglabag sa tawhanong-kinamatarung sang pumuluyong Pilipino. Nanawagan man sila sa iban pang partido, organisasyon kag indibidwal nga sikwayon ang “gera kontra-terorismo” sang rehimen kag suportahan ang paghimakas nga Pilipinhon para sa pungsodnong kahilwayan kag demokrasya.

Ginpresentar ang isa ka resolusyon nga nagaunod sang panawagan nga ini sa isa ka sesyong plenaryo sang International Communist Seminar sa Brussels, Belgium sadtong Mayo 6. Kwarenta’y kwatro sang partido komunista kag rebolusyonaryong organisasyon

ang pumirma sa nasambit nga resolusyon.

Lakip sa mga pumirma amo ang Workers' Party of Belgium, Partido Comunista de Cuba, Partido Comunista de Venezuela, Movement Towards Socialism of Bolivia, Partido Comunista do Brazil, Partido Comunista Marxista-Leninista del Ecuador, Workers' World Party of the USA, Freedom Road Socialist Organization of the USA, Syrian Communist Party, Russian Communist Workers' Party, Workers' Communist Party of Norway, Communist Party of Sweden.

Nakig-isa man ang All Nation Movement for Democracy and Progress of Afghanistan, Communist Party of Albania, Parti Alegerien pour la Democratie et le Socialisme (Algeria), Kommunistische Initiative Osterreich (Austria), Communist Party of Bangladesh (ML), Socialist Party of Bangladesh, Communist Party of Soviet Union,

Movimiento Revolucionario 8 de Octubre (MR8-Brazil), Socialist Workers' Party of Croatia, Communist Party of Denmark, Danish Communist Party, Communist Workers' Party for Peace and Socialism (Finland), Communistes, PRCF kag URCF (tanang sa France), Communist Party of Germany, Socialist Unity Centre of India, Socialist Party of Latvia, Socialist Party of Lithuania at Communist Party of Lithuania.

Pumirma sa resolusyon ang Partido Democratico Popular Revolucionario (Mexico), Nepalese People's Progressive Forum-Belgium, United Nepalese Front-Europe, Red Workers' Communist Party AKP (Norway), Democratic Front for the Liberation of Palestine, Movement of Yugoslav Workers (Serbia), Communist Party of Slovakia, Partido Comunista de los Pueblos de España kag Union Proletaria (pareho sa Spain), The Labour Party of Taiwan (prubinsya

sang Taiwan, China), Parti Communiste Ouvrier Tunisien (Tunisia), Communist Party of Turkey, Union of Communists (Ukrainer) kag Communist Party of Great Britain (ML).

Ang resolusyon nga ini ang pinakaulihi lamang sa nadamu na nga mga resolusyon kag panawagan sang mga organisasyon kag indibwal nga nagainsister sa rehimeng Arroyo nga untaton na ang mga pangpulitika nga pagpamatay sa pungsod.

Nagpahayag man sang suporta ang mga pumirma sa mga pagtinguha sang pumuluyong Pilipino batuk sa rehimeng Arroyo. Nagasaludo sila sa ligal nga demokratikong hublag sa kasyudaran kag sa BHB sa paghatag sini sang mabaskog nga bunal sa mga reaksyunaryong pwersa. Ginpakamalaut man nila ang pagbilang kay Prof. Jose Maria Sison, sa PKP kag BHB bilang mga terorista.

## Himbunanay sang gubyernong Arroyo kag San Miguel Corporation, ginkundenar

MABASKOG nga ginkundenar sang Partido Komunista sang Pilipinas ang pagtugot sang Sandiganbayan sadtong Mayo 11 sa San Miguel Corp. (SMC) nga ibaligya ang P6 bilyon nga balor sang mga sapi nga nabakal ni Eduardo "Danding" Cojuangco Jr. gamit ang pondo nga pilit ginkulekta halin sa gamay nga mangunguma sa mga niyugan sadtong panahon sang diktaduryang Marcos (*coco levy funds*). Ang nasambit nga pondo gindeposito sa United Coconut Planters Bank (UCPB) nga ginatag-iyahan ni Cojuangco. Sadtong 1975 ilegal nga gingamit ni Cojuangco ang pondo nga ini para magbakal sang sapi sa SMC.

Nagaagaway subong ang Sandiganbayan kag Presidential Commission on Good Government (PCGG)

sa pondo nga dapat makadto sa pila ka milyon nga gamay nga manugniyog. Natabo ang nasambit nga bentahanay samtang ara pa sa korte ang halambalanon kon sin-o ang matuod nga nagapanag-iyang sang pondo. Ginapaguwa sang PCGG nga gubyrno ang nagapanag-iyang sang pondo kag dapat ini makadto sa reporma sa lupa. Pero pareho man sang Sandiganbayan, wala ginakilala sang PCGG nga ang gamay nga manugniyog amo ang matuod nga tag-iyang sang nasambit nga pondo kag nagbalibad man ini nga ibalik sa ila ang pondo.

Gintugutan sang First Division sang Sandiganbayan nga makabenta si Cojuangco sang 56, 581, 813 Class B Shares nga ara sa ngalan sang 11 korporasyon nga ginatag-iyahan niya agud mabayaran ang

ila mga utang sa United Coconut Planters Bank (P5.3 bilyon) kag Bank of Commerce (P2.6 bilyon).

Sa desisyon sang Sandiganbayan nga ini ginluiban na naman sang gubyrno ang away sang gamay nga manugniyog agud makadto sa ila ang nasambit nga mga sapi. Sadtong 2003, ginbalewala sang Sandiganbayan ang order nga isekwester ang nasambit nga mga sapi kag sadtong 1998, gintugutan man sang Sandiganbayan si Cojuangco kag ang iya mga kumpanya nga gamiton ang mga sapi agud makaboto sa eleksyon sang San Miguel para sa *board of directors*.

Samtang, padayon ang away sang gamay nga manugniyog para makadto sa ila ang *coco levy funds* nga ginkawat sa ila ni Cojuangco.

## Mga Iraqi, nagboto batuk sa okupasyon sang US

MISMO ang parlamento sang Iraq ang pumirma na sa isa ka petisyon para pahalina ang mga pwersa nga mananakop sang US. Sadtong Mayo 11, mayorya sang parlamento ang nagpabor sa hagna nga resolusyon agud pahalina na ang mga tropa sang US. Ang resolusyon nga ini mabaskog nga sampal sa gubyernong Bush.

Ang pagpirma sa petisyon sang mayorya pamatuod sa madugay na nga sentimyento sang mga Iraqi nga dapat maghalin na sa pinakatemprano nga panahon ang mga Amerikano. Madumduman nga sadtong Abril, bilang protesta sa pagpasugot sang rehimeng al-Maliki sa pagpalawig pa sang mga pwer sang mananakop. Gin-atras sang mga Shiite ang anum nila nga mga tiglawas sa iya kabinete.

Nagabaskog ang presyur sa sulod sang US kag Iraq agud makahimo na sang iskedyul sa paghalin sang mga tropang Amerikano. Ini sa tunga sang padugang sang US sang tatlo ka brigada, ukon 7,000 tropa sa Baghdad kag mga kaingod nga duog, kag ang ginasigahum nga pag-abot sang duha pa nga brigada sa masunod nga duha ka bulan.

Pero ang mga dugang nga tropa nga ini wala nakabuhin sa adlaw-adlaw nga kalakasan kag pagpamomba. Nagapadayon ang pagbato sang mga hangaway nga Sunni kag Shiite sa mga tropa nga nagasakop sa Iraq kag nagalapnag pa sa mga syudad kag banwa sa guwa sang kabisera sang Iraq ang inaway. Wala man nagauntat ang pagpamomba sa mga imprastruktura sa produksyon sang langis gani indi lubos mapangin-pusan sang mga imperyalista nga kumpanyang Amerikano ang mga ini.

## Iraq oil bill, ginbalibaran sang mga Iraqi

MABASKOG nga ginbalibaran sang mga mamalidha kag negosyanteng Iraqi ang hagna nga layi sang US nga ibukas ang produksyon sang langis sa mga dumuluong nga imperyalista nga kumpanya. Ginsaylo na sang mga pribadong kumpanya sang langis sa Iraq sa Iraqi National Oil Company ang pagdumala sa rekonstruksyon sang madamu nga imprastruktura sa produksyon sang langis ukon *oil wells* na nagguba tuga sang pagpanalakay sang US sadtong 2003. Pero tubtub subong, kadam-an sang mga ini wala pa makay-o sa pihak sang pagdali-dali sang US.

Indi makalarga ang rekonstruksyon sang mga nasamad nga *oil well* bangud puno ini sang kagarukan kag patuyang ang proseso kag pagdumala sini. Dugang diri, padayon nga ginasabotahe sang mga hangaway nga Iraqi ang mga pagtinguha sang US kag papet nga rehimen nga pangin-pusan ang mga ini.

Ang Iraq ang may ikaduha nga pinakadaku nga reserba sang langis sa kalibutan. Luwas diri pinakamataas man ang kalidad sang langis sini kumparar sa iban nga pungsod sa Middle East. Gani nagalaway ang mga imperyalistang kumpanya nga makuha ini.

Pero halin nga sakupon sang US ang Iraq sadtong 2003 binilyon nga dolyar na sang produktong langis ang nareport nga nadula. Antes ginbomba sang US ang Iraq, nagaabot sa duha ka milyon nga bariles sang krudo nga langis/ adlaw ang produksyon sini. Subong ginatantya nga 100,000 tubtub 300,000 bariles/adlaw ang nakadula. Kon kwentahon ini sa \$50 kada bariles nga presyo subong, nagaabot na sa ginatus-gatos kabilyon ang nagakalugi sa mga kumpanyang imperyalista. Dugang diri, natukiban sa isa ka panalaw-

saw sang US sadtong Abril ang pagkadula sang minilyon nga bariles sang langis bunga sang korapsyon ukon ismagling.

Suno sa mga mamalidha kag negosyanteng Iraqi, indi nila pagitugyan sa US kag kay Bush ang manggaranon nga resorsa sang langis sang ila pungsod, kag indi man magsugot ang mga Iraqi sa kagustuhan sang mga imperyalista nga agawon ang manggad sang Iraq.

Luwas sa nagakadula nga mga suplay sang langis, ginatantya nga nagaabot sa \$10 bilyon ang nawasi sa badyet sang gubyerno sang US para sa rekonstruksyon sang Iraq. Kadam-an sini amo ang dalagku nga kontrata nga ginsolo sang Haliburton Co., Kellogg, Brown and Root (subsidiary sang Halliburton) kag Bechtel Corp., mga kumpanya nga Amerikano nga konektado kay US Pres. George W. Bush. Nagserbi man nga upisyal sang Haliburton Co. si Vice Pres. Richard Cheney.

Sa pihak sini tatlo ka US Army *reserve officers* kag duha ka sibilyan pa lamang ang nakasuhan bangud sa paghatag nila sang \$1 milyon nga balor sang kwarta, malahalon nga salakyan, malahalon nga alahas kag iban pa agud makakuha sang proyekto nga rekonstruksyon. Tubtub subong ginapaimbestigahan gihapon sang Senado kag Manubo nga Panalagan sang US ang dalagko nga kontrata nga wala pa ginadetalye sang mga kumpanya nga ini.

Indi lang sa pagpatuyang sang pondo pangrekonstruksyon sang Iraq nga imbolbado ang mga daluk nga kumpanya nga ini. Imbolbado man ang Halliburton kag Bechtel sa kagarukan sa rekonstruksyon sang mga lugar sa US nga ginhalitan sang Bagyong Katrina kag sa mga kontrata sa Balkan *peninsula*.



**ANG****Bayan****Pahayagan ng Partido Komunista ng Pilipinas  
Pinapatnubayan ng Marxismo-Leninismo-Maoismo**

Edisyong Hiligaynon

Tuig XXXVIII No. 10

Mayo 21, 2007

www.philippinerevolution.net

*Editorial*

# Eleksyon 2007: lubos nga garuk

**P**ila ka beses nga ginpalain sang nagaharing barkadahan Arroyo ang garuk nga sistema sang eleksyon sa Pilipinas. Sobra-sobra ang kalakasan, pagdinaya, pagpanuhol, mahigko nga maniobra kag pagpamersa sa eleksyon sining Mayo. Ginahimo ini paagi sa militar, pulis, mga tinawo sa Comelec kag burukrasya. Labi nga tumingkad ang kawad-on sang unod sang ginasiling nga demokratikong eleksyon sa idalum sang subong nga reaksyunaryong sistema.

Pinakamatingkad ang pagdinaya sang kampo Arroyo sa Maguindanao, Lanao del Norte at Lanao del Sur kon sa diin nagluntad ang halos 12-0 nga resulta sang eleksyon sa pagkasenador pabor administrasyon. Ginsundan pa ini sang pagtuluhaw sang 12-0 pabor sa Team Unity sa pila ka pulo pa nga munisipalidad nga kontrolado sang mga idu-ido ni Arroyo.

Permi ginapabugal sang Team Unity sang Malacanang nga ang boto sa Mindanao kag Visayas ang makapadaug sa ila. Bug-os ang kumpyansa sang mga kahimbon ni Arroyo bangud nakapwesto gihapon ang mga manugdaya nga upisyal sang Comelec sa Mindanao nga imbolbado sa pagdinaya nga "Hello Garci" ni Arroyo sadtong 2004. Sa Mindanao ginhimo ang pinakadaku, pinakalapnagon kag pinakabaraghal nga pagdinaya.

Sa Maguindanao, pareho sang ginbuyagyag sang Moro Islamic Liberation Front, wala sang pagbinotohan nga natabo. Sa baylo, mga *election inspector* na


ang nagpuno sa mga balota nga ginapamarkahan lamang sang *thumbmark* sang ga bata. Amo man ang natabo sa Sulu.

Todo-todo man ang pagdinaya sang administrasyon sa Lanao del Norte, Lanao del Sur kag Zamboanga Sibugay. Sa mga lugar nga ini, palupareho nga sulat sang kamot sang isa ukon pila ka tawo ang ara sa mga balota kag canvass sang mga boto. Paagi sang pagdinaya sa Mindanao, sarang nga butungon paidalum ang tatlo tubtub apat nga kandidato sang Genuine Opposition agud isal-ot ang mga kandidato sang Team Unity.

Mismo ang Comelec ginagamit sa pagdinaya kag manipulasyon sang eleksyon. Sa duso sang Malacanang, ginapauntat sang Comelec ang ginahimo nga pagreport sang midya sa pag-isip sang boto.

Ini bangud sa madamu nga instansiya na-paabot gilayon sa publiko ang resulta sang isipay sa mga presinto antes pa man ini maretoke sang mga opereytor ni Arroyo.

Sa Isabela, ginreport sang NDF-North-eastern Luzon nga mismo pinuno sang Comelec nga si Benjamin Abalos ang ginsuhulan sang P200 milyon agud siguruhon nga makapungko si Benjamin Dy bilang gobernador. Ang padihot nga patalsikon si Grace Padaca bilang gobernador naghalin mismo kay arroyo. Sa pihak sang abante

**Mga tampok  
sa isyu nga ini...****Sampal kay Arroyo**  
PAHINA 3**Sunud-sunod  
nga bunal sa AFP**  
PAHINA 5**Panaysayon sag  
makasiligni nga  
pasismo**  
PAHINA 8

## Mga instruksyon sa paglilimbag

**1.** Ang **sinundang pahina**, na eksaktong kopya ng pahina 1 maliban sa mas mapusyaw ang *masthead* o *logo* ay para sa mga gumagamit ng *mimeo machine* o naglilimbag sa paraang *v-type*. Idinisenyo ito para hindi madaling makasira ng istensil.

**2.** Pag-*print* sa istensil:

- a) Sa *print dialog*, i-check ang **Print as image**
- b) Alisin ang *check* sa **Shrink oversized pages to paper size**
- k) I-click ang **Properties**
- d) I-click ang **Advanced**
- e) Tiyaking naka-set sa **100%** ang **Scaling**
- d) Ituloy ang pag-*print*

**3.** Hinihikayat ang mga kasama na ipaabot sa patnugutan ng *AB* ang anumang problema kaugnay ng paglilimbag sa pamamagitan ng *v-type*. Magpadala ng *email* sa *angbayan@yahoo.com*